


EMALIO

Emprim roman da fantasy sursilvan

Fantasy prosperescha: cudeschs, gieus e films cun istorgias fantasticas da pievels esters, reginavels obscurs ed autras dimensiuns, raquints plain magia naira e conflicts ominus èn dapi onns sin las glistas dals bestellers. Cun Emalio datti ussa l'emprim cudesch da fantasy per sursilvan, scrit da las duas auturas giuvnas Flurina Albin (Lumbrein) e Stina Hendry (Vella) ed edì da la Chasa Editura Rumantscha (CER).

Tge che ha cumenzà sco project da scriver en la Scola superiura Lumnezia è daventà in project da publicaziun. L'entschatta dal 2013 ha la scolasta secundara Carin Cadruvi contactà la CER cun la remartga che duas scolaras scrivian plain gust in'istorgia da fantasy; ellas hajan enstagl da las 30 paginas dumandadas inoltrà 142 paginas! E quellas paginas han persvadì la cumissiun da program da la CER. Cun in lectorat accum-



pagnant è il manuscrit creschì ad in cudesch da 360 paginas. Che duas giuvnas restan vi dad ina chaussa per in temp talmain lung, lavuran ambiziusamain e mantegnan la motivaziun, na sa chapescha betg da sazez. Per tge ch'i va en l'istorgia: Il retg stgir smantscha e conquista cun sia armada da dragants adina dapli regiuns e pievels. Er ils ul-

dauns vegnan chatschads adina pli fitg a chantun. La suletta via da cumbatter il nausch è da s'unir cun ils auters pievels e da sperar sin la forza dals elements. Il destin trametta il giuven uldaun Emalio sin viadi tar ils centaurs. In viadi, durant il qual tut vegn auter che planisà e che prenda ina fin raffinata che na plascha betg mo a fans da fantasy. Las duas scriventas han creà in'istorgia da gronda tensiun plain elements fantastic che sa splega en in mund cun divers pievels misterius, in'istorgia cun ina fin raffinata che na plascha betg sulet a fans da fantasy. Il cudesch sa preschenta sco cudesch da fantasy classic cun elements grafics correspundents ed ina charta da las differentas regiuns che sustegna l'orientaziun dals lecturs.

In novum è la plattafurma www.emalio.ch nua ch'ins po dar resuns davart il roman. Ultra da quai ha la scolasta Carin Cadruvi elavurà a basa dal cudesch ina lecziun per il med d'instrucziun Access.

Il cudesch custa CHF 29.00 e po vegnir tratg en ils Volgs da la Lumnezia, en librerias u sut www.chasaeditura.ch.

TA REGISTRESCHA PER TIA LINGUA

«Tut las Rumantschas e tut ils Rumantschs da l'entir mund èn obligads da vegnir en Chasa Rumantscha per sa laschar registrar – e quai ils 15-05-2015 a las 15.15», hai gi num en in leprello d'infurmaziun davart lingua e cultura rumantscha che la Lia Rumantscha (LR) aveva creà a chaschun da sia preschientscha a la Higa a Cuira il 2014. Passa 150 persunas èn suadadas l'appel in onn pli tard ed èn sa registradas en il cudesch da las Rumantschas e dals Rumantschs ubain èn s'inscrittas online.

Il motiv per l'appel da sa registrar è il fatg ch'igl è difficil d'eruir il dumber precis da las persunas che discurren e che chapeschan rumantsch. Las indicaziuns varieschan fermamain e per part n'èn ellas betg pli actua-

las. Ins po leger da 30000, mintgatant era da 60000 Rumantschas e Rumantschs. E lura datti statisticas che pretendan che perfin radund 100000 persunas consume-schian di per di medias rumantschas.

L'ultima dumbraziun dal pievel federala datescha dal 2000. Las dumondas specificas suenter la lingua ch'insatgi sappia il meglier e suenter la(s) lingua(s) ch'insatgi discurre regularmain en famiglia, en scola e/u en la professiun han purtà resultats che permettan bain in'analisa pli detagliada. Els na tegnan però betg dal tutfatg quint dals bassegns dal rumantsch. Ils Rumantschs èn tuts bilings u plurilings. Tar l'emprima dumonda da la dumbraziun han els pudì inditgar suletmain ina lingua. Bliers han uschia declerà il tudestg sco lingua ch'els san il meglier, damai ch'els la dovran savens pli frequentamain en lur mintgadi professiunal e la san en il fratemp gist uschè bain

u schizunt meglier che lur atgna lingua materna. Tala moda èn numerusas persunas da lingua rumantscha franc idas a perder en la tschungla statistica.

La dumbraziun iniziada da la LR vul dar la pussaivladad a mintgina e mintgin che sa senta sco Rumantscha u Rumantsch, independentamain da las competenzas linguisticas, da sa registrar e da contribuir ad in dumber pli represchentativ. Questa dumbraziun dura anc fin l'atun 2019. Fin il di dad oz èn s'inscrittas 4260 persunas. Il formular electronic per sa registrar chattais Vus sin www.liarumantscha.ch. Là ves'ins adina gist er il stadi actual. Tgi che vul sa perpetniser pli gugent persunalmain en il cudesch da la Rumantschas e dals Rumantsch, po far quai en Chasa Rumantscha a Cuira, en ils centers regiunals da la LR a Laax, Savognin, Vargistagn e Zernez ubain a chaschun da differentas occurrenz localas e regiunalas.

ARTISTS RUMANTSCHS VISITAN BEIRUT

CultuRa+, il program da cultura da la Lia Rumantscha (LR), metta a disposiziun ensemble cun l'ambassada svizra a Beirut in atelier d'art en la chapitala dal Libanon. Durant maximalmain trais mais pon artistas ed artists sfundrar en la vita culturala variada e sfurmiclanta da Beirut e lavurar vi da lur projects rumantschs.

La LR ha ussa tschernì ils artists che dastgan prender dimora en l'atelier a Beirut. I sa tracta da l'illustratura Pia Valär, dal fotograf Donat Caduff e da las trais teatristas Annina Sedláček, Anna Mengiardi e Marina Blumenthal. Ils projects che las artistas e l'artist elavuran durant quel temp vegnan pre-

schentads l'emprim a Beirut e suenter lura er en il Grischun. Grazia a la stretga collavuraziun cun l'ambassada svizra a Beirut pon vegnir stabilids contacts cun persunas da la scena culturala locala gia avant il segiurn en l'atelier. Pia Valär, oriunda da Zuoz, vegn a crear cartas postalas cun motifs da la citad, ina moda da far reviver questa bella furma da comunicaziun che para dad ir en emblidanza en ils temps da WhatsApp e Facebook. Avant e durant sia dimora en il Libanon pon Rumantschas e Rumantschs empu-star cartulinas per trametter salids ad enconuschents ed amis.

Cun il project «Denter Bever e Beirut» vul il fotograf Donat Caduff (Sagogn) mussar las parallelas respectivamain las differenzas tranter la Rumantschia ed il Libanon. Èsi il medem plaschair dad ir cun skis sin ils

culms libanais sco sin il Corvatsch? Na tschalattan las undas dal Lai da Segl e quellas da la Mar Mediterrana davant Beirut betg a moda sumeglianta? Las repostas a questas dumondas vules l'artist chattar en il mund da la fotografia e da l'illustraziun. Las trais acturas Annina Sedláček (Sent), Anna Mengiardi (Ardez) e Marina Blumenthal (Morissen) vulan laschar s'inspirar da l'atmosfera multifara da Beirut e far in agen purtret da l'Orient. Cun «O, riaint!» elavuran ellas in program comic che sa basa sin musica e chanzuns rumantschas. Il vent da l'Orient cun sia differenta cultura è ideal per enretgir las ideas da las teatristas.

Lia Rumantscha, Via da la Plessur 47, CH-7001 Cuira, telefon +41 81 258 32 22, info@rumantsch.ch, www.liarumantscha.ch